



## Qurannoo Asilii

### Yoomessa Taphni Ijoollee Oromoo Maccaa keessatti Taphatamu

Hundumaa Dabalii<sup>1\*</sup>, Taddasaa Jaallataa<sup>2\*</sup>, Waaqtolaa Waaqjiraa<sup>3\*</sup>

Muummee Afanifi Ogbarruu Oromoo, Yuunvarsitii Wallaggaa, L.S.P. 395, Naqamtee, Itoophiyaa

#### Axereraa

Ijoolleen akka garee hawaasaatti jirenya keessatti qooda fudhatan niqabu. Qoodni hawaasummaa kun yoomessa adda addaa keessatti adda addummaa qabaata. Yoomessi taphaa mataasaatiin taphaaf haalli mijataan jiraachuufi dhiisu, akkasumas, akaakuu tapha ijoolleen taphachuu danda'an murteessa. Fakkeenyaaaf yeroofi waqtilee adda addaa keessatti wantootni hawaasni raawwatuu itti gaafatamummaa yookaan qooda adda addaa ijoolleen fudhatan murteessa. Itti gaafatamummaan adda addaa sababii adda addummaa yeroofi waqtileetiin isaan qooddatanii raawwatan, taphootaakkam akkamii taphachuu akka mijatuufi himmijanne agarsiisa. Kana malees, bakki jirenyaaifi oolmaa ijoollees wantoota qoodasaanii murteessan keessa tokko. Bakki jirenyaa magaalaafi baadiyyaa ta'u walii kan walqabatu yoota'u, bakki oolmaammoo yeroo boqonnaafi hojii iddo ijoolleen itti dabarsan ilaallata. Qurannoon kunis ijoolleen Oromoo Maccaa yeroo, waqtileeniifi bakkeen isaan keessa jiraatan itti gaafatamummaa isaan fudhatan murteessuun tapha isaaniirratti dhiibbaasaan geessisan qorachuuratti xiyyeffata. Qurannoon kun bu'uura yaadxinoota: tajaajilaa, galumsaafi ijaarsa hawaasummaatiin adeemsifame. Ragaaleen qorannichaas aanaalee Giddaa Ayyaanaa, Gachii, Najjoo, Waayyuu Tuqaafi Jimmaa Gannatiitii ijoollee, maatii ijolleefi barsiisotarraa sassaabame. Qurannichi ragaalee ijolleerraa bakka hojii adda addaa hojjetanitti (horii tiksuu, midhaan eeguu, mana eeguu, barumsa baratan), bakkeen taphaa adda addaatti (laga daakaa, dirree kubbaa, naanno qe'eetti) fi yeroo ga'eeyii walii dabarsanitti (galgala galgala maatii keessattifi mana barumsaatti barsiisota walii) sassaabameen geggeeffame. Kunis daawwanna, afgaaffiifi marii garee hirmaachisaatiini. Bu'aan xiinxalliin ragaalee kanaas, Oromoo Maccaa keessatti ijolleee yeroo, bakkeenifi waqtilee adda addaa keessatti taphoota gosa adda addaa akka taphataman agarsiisan. Kunimmooyomeessi tapha ijolleen tapha ijolleen taphatan akka murteessu mul'isa. Kanaaf, gosoota taphaa ijolleen Oromoo Maccaa taphatan adda baasuufi guutummaatti hubachuuf yoomessa fuuleffachuu barbaachisaa ta'a.

#### Article Information

##### Article History:

Received: 09-08-2023

Revised: 22-09-2023

Accepted: 26-11-2023

**Jechoota Ijoo:** Yoomessa, Ijoollee, Tapha, Oromoo Maccaa

\*Qorataa Muummee:  
Hundumaa Dabalii

E-mail:

hundumao@gmail.com

## Seensa

Hawaasa qorannoowwan ijoollee keessatti taasifaman hunda keessa taphni ijoollee jira. Ta'us garuu aadaatii aadaatti garaagarummaa baay'ee qaba. Hawaasni tapha karaa ofii ofiisaa ilaalarraan kan ka'e, akka itti ga'eeyyii tapha ijoollee ilaalaan walhinfakkaatu. Aadaan ga'eeyyii tapha ijolleerraan dhiibbaa geessisuwaan danda'uuf, taphni akka bu'aa aadaatti ilaalamuu danda'a. Karaa biraatiinimmoo, ijolleen tapha taphatan fooyyeessaafi jijiiraa waan deemaniif, taphni uumama yookaan jijiirama aadaaf sababa ta'uu danda'a (Gosso, 2010). Taphni ijoollee kun dirreewwaan qorannoo adda addaa keessatti bifaa addaa xiyyeefatamaafi qoratamaa har'a ga'e. Jalqabbiin qorannoo fookloori ijolleen yookaan taphaa jaarrea 19<sup>ffaa</sup> keessa yemmuu ta'u, ijoollummaan immoo jalqaba 1960<sup>ootaa</sup>ti (Grider 1980, Tucker, 2008, Tucker, 2012). Qoranno ijolleen yeroo sanaa moodela Darwin isa ijoollummaa akka sadarkaa guddinaa gad aanaa, guutuu hinta'inii, hinqaroominiifi akka sadarkaa qophii gara qaroominaatti ilaalu fuuleffata (Mechling, 1996; Tucker, 2012).

Boodarra ijolleeffi ijoollummaan akkaataa garaagaraa hubatamaafi ibsamaa dhufan. Akkaataa itti ijolleen ibsaman keessa ulaagaan umrii isa tokkoodha. Kunis, eenyummaa ijolleeffi guddinaan sadarkaa akkamiirra akka jiraniifi bilchina hangamii akka qaban kan agarsiisuudha (Plastow, 2015). Ulaagaa umriiratti hundaa'uun hiika waliigalaa kennuun kun haalaafi muuxannoo ijolleen ilaalcha keessa waan hingalchineef rakkoo qabaata (Norozi & Moen, 2016). Rakkoolee inni qabu keessaa tokko, ijolleen hundumtuu umrii walfakkaataarratti guddina qaamaa, hawaasummaafi xiinsammuu

walfakkaataa kan hinagarsifne ta'uudha. Guddinni ijolleeffi umriiratti utuu hintaane, dhiibbaawwan kan biroo warreen akka, haalleen naannoo, hawaasummaafi aadaarrattis waan hundaa'uuf (Norozi & Moen, 2016), akka hanquutti ilaalamuu mormama.

Ijolleeffi ijoollummaa gama xiinsammuu ni ilaalamu. Kunis ijolleeffi ijoollummaa guddina ijolleeffi waliin walqabsiisee kan dhiheessuudha (Prout & James, 1997). Akka hubannoo kanaattii, daa'imni adeemsaa guddina uumaamaa (natural growth) keessa darbuun ga'eessummaarra ga'a. Moodellii dagaagina daa'imaa kun, adeemsaa guddina uumamaafi hawaasaa walitti kan fidu ta'ee raawwilee ijolleeffi kanneen akka: fayyadama afaanii, taphafi hariiroo akka agarsiistuu jijiirama adeemsaa guddinaatti ilaala (Prout & James, 1997). Jirenya hawaasummaa ijolleeffi fooyya'iinsa haala hawaasummaa keessatti ijolleen qabaataniif xiyyeefanno hinkennamu.

Qoranno fookloori ijolleeffi keessaatti, 1950<sup>ota</sup> keessa sassaabbiif fookloori ijolleeffi dura taasifamaa turerraan bifaa adda ta'ee ga'eeyyiirraa sassaaburra, yoomessa adda addaa keessatti yeroo ijolleeffi taphatan isaanirraa sassaabuun qorachuu jalqabuun Peter fi Iona Opien boqonnaa haaraa ta'e (Grider, 1980). Kunimmoo, ijolleen akka gartuu aadaa tokkootti ilaalamu taasise. Ijoollummaanimmoo aadaa yookaan barsiifata gartuu ijolleeffi jedhamuun kan waliin walqabatuudha. Qorattootni fookloori barnoota alidilee hiriyootarraa bifaa aadaan argamu fookloori ijolleeffi (children's folklore), qo'annoo ijolleeffi (children's lore) yookaan qo'annoo daa'imaa (childlore) jedhanii waamu. Fooklooriin ijolleeffi ijolleen

kalaqamee kan ijoolleen waliin qooddatan yookaan gargaaramaniidha. Kanarraa karaa adda ta'een ga'eeyyiinis ijolleef fookloori qopheessuu nidanda'u. Kunimmoo fookloori ijolleef qophaa'eedha.

Fookloriin ijolleee kan ijolleee uummatanii fayyadaman yookaan ga'eeyyi qopheessaniif qofaa utuu hintaane, ga'eeyyiifi ijolleen waliin kan uumanis nijiraata. Kanaan walqabsiisee Cieślikowsk (2019) yaada Tucker (2008) fookloori ijolleefi fookloori ijolleef ga'eeyyiin qophaa'e jettee kaastetti dabalataan ijolleen hariiroo ga'eeyyi waliin qabaatan keessatti waan ga'eeyyiirraa fudhatanii fooyyeeffatan akka qaban ibsa. Akka Cieślikowsk jedhutti ga'eeyyiin fookloori ijolleee keessatti hirmaachuu waan gumaachaan waan qabaniifi hirmaannaa ijolleefi ga'eeyyiin fooklooriin uumamu jira. Kun garuu fookloori akaakuu sadaffaan ijolleefi ga'eeyyiin uumamuufi abbummaan isaa qixxee ta'e akka jiraatu kan taasisu utuu hintaane, ijolleen fookloori ofiisaanii keessatti dhiibbaa ga'eeyyiirraa dhufu tarsiimoo ofiisaanii fayyadamuun akka mo'atanii kan agarsiisuudha.

Qorannoon fooklooriin ijolleee Afrikaa geggeeffame baay'ee kan jedhamu miti. Qorannoon muraasni hojjetaman fookloori ijolleee jaarmiyaa hawaasummaa aadaafi duudhaa hawaasaa tursuuf kan fayyadan taasisanii kallattii tajaajilaan kanneen ilaalanidha (Bronner 1988, Tucker 2008, Tadesse, 2013). Akka ilaalcha kanaatti, fooklooriin ijolleee Afrikaa afaniin kan daddarbu, ga'eeyyiirraa ijolleetti kan ce'uufi ijolleen yeroo hunda dhaaltota aadaafi duudhaati. Kunimmoo, hirmaannaa ijolleen kalaqqii, hojiirra oolmaa yookaan raawwiifi

lufiinsa fookloori keessatti qaban kan dagatee yookaan xiqqeesse ta'uusaa agarsiisa.

Gama kaaniin immoo hojiilee kallattii warra ijaarsa haala hawaasummaatiin jiran, tajaajilatti dabalataan ga'ee ijolleen fookloori uumuufi fooyyeessuuf qaban ilaaluu akka xiyyeffatan Tadessen (2013) kaa'eera. Haaluma kanaan, Tadessen (2018), afseenaa himuun (storytelling) wantoota ijoo lama akka of keessa qabu eera. Inni duraa, himuufi dhaggeeffachuu yoo ta'u, inni lammataa immoo, haala yookaan galumsa waliin walqabsiisanii mari'achuu, hiikuufi hubachuudha. Kanaaf, ijolleen tapha yemmuu taphatan haala keessatti taphatanirratti hundaa'uun karaa ofii isaanii taphicha irra deebi'anii bocaap taphatu. Fooklooriin ijolleee Afrikaa qaama jirenya guyyuu ta'uusaatiin, ijolleen waliisaanii ga'eeyyi wajjiin qoddachuu keessa beekumsa horatu (Finnegan 1967; Kuyvenhoven, 2007; Eder, 2010; Tadesse, 2011, 2014, 2018). Ga'eeyyiin tapha keessatti hirmaachuuufi dhabuun walabummaa ijolleen qabanirraatti dhiibbaa geessisuun haalotni taphaa adda addaa akka jiraatan taasisa. Sims fi Stephens (2005) akka ibsanitti, haalotni fooklooriin keessatti adeemsifamu kunimmoo hurruubummaafi yoomessa fooklooricaha of keessaa qaba. Akka Chudacoff (2007)ttis, fooklooriin ijolleee haalota afur: naannoo yookaan yoommessaa, meeshaalee, qooda fudhatootaafi walabummaa taphaa akka of keessaa qabu ibsa.

Taphni ijolleee yoomessa adda addaa qaba. Yoomessa taphaan walqabsiisee Tadesse (2013)n hojiileen ijolleen akka qaama jirenya guyyuutti mana, bakka tikaafi mana barnootaatti hojjetan taphasaaniif yoomessa

### *Hundumaa D. fi kb*

bakkaa ta’uu eera. Ijoolleen galgala galgala yeroo ga’eyyii waliin qabaatan keessattiifi guyyaa guyyaa waliisaanii wajjin bakkeen horii tiksaniitti taphoota adda addaa taphatu jedha. Mana barnootattis yeroon boqonnaa ijoollee yoomessa yeroo tapha ta’uu agarsiiseera. Gouglous (2003) immoo taphoonni ijoolleen mana barumsaatti taphatan gama bakkaa, yeroofi meeshaalee taphaatiin daangeeffamaa akka ta’e ibsiti. Ijoolleen mana barumsaatti bakka taphaaf daanga’eef qofa keessatti yeroo isaanii eyyamametti taphatu. Meeshaalee taphaa fudhatanii mana barumsaa dhaquunis baay’ee hineyyamamuuf. Kanaaf, taphni ijoolleen mana barumsaatti taphatan kan isaan manattiifi naannoo qe’eetti taphatanirra bakka, yeroofi meeshaalee taphaan daangaa qaba jechuudha.

Haala jirenya ijollee warra dhihaa xiyyeffachuu Rasmussen (2004), jirenya guyyuu jiraatan keessatti ijolleen caalmaatti yoomessa sadan: mana jirenyaa, mana barumsaafi bakkeen bashannanaa keessa akka socho’an falma. Yoomessi kun akka “iddoo ijollee”tti ga’eyyiidhaan akka murtaa’eefi qophaa’eef ibsuun qorannoosaa keessatti garuu, muuxannoofi ibsa ijolleen yoomessa keessa oolaniif kennanirraa yoomessi oolmaa ijollee dabalataan of danda’ee akka jiru agarsiise. Kunis, “iddoon ijollee” guutummaatti yoomessa idilee ga’eyyiin kan murtaa’uufi hogganamu qofa utuu hintaane, yoomessa alidilee ga’eyyiin quba hinqbne akka hammatu agarsiisa.

Bakkeen taphaa akka qaama yoomessatti tapha ijollee keessatti ga’ee guddaa qaba. Akka Chudacoff (2007)tti, taphni sadarkaa yaadaatti bakka fedhettu taphatamuu kan danda’u yoo ta’eyyuu, yoomessi uumamaa

### *Jor. Dil. Qor. Adoolessaa-Mudddee 2023, 1(2), 73-97*

(bosona, lageen, dirreeleefaa), bakkeen hawaasummaa (daandiirra, bakkeen bashannanaafaa)fi manneen jirenyaa (mana keessaafi naannoo qe’ee) yoomessa taphaa ijoo ta’an sadani. Ijolleen naannoo ofisaaniitiin hintolchineefi hinhogganne, kan ga’eyyiitiin hogganamu keessatti guddatu. Naannoma kana keessatti yoomessa taphaaf isaanii ta’u mijeffatu. Qorannoon kunis ijolleen Oromoo Maccaa, yoomessa yeroofi bakkaa isaan keessatti taphatanifi hariiroo taphni murtaa’aan tokko yoomessa keessatti taphatamu waliin qabu adda baasuu kan fuuleffatuudha.

### **Malleen Qorannichaa**

Qorannichi akka Brewer (2000) akeekutti yoomessa tapha ijollee qorachuuf, tapha ijolleen akka qaama jiruufi jirenya isaaniitti yoomessa dhugaa keessatti taphatan keessatti kallattiin qooda fudhachaa ragaa sassaabbachuu kan adeemsifame waan ta’eef, gosaan sanyaabsaadha. Dhihaannaasaatiin immoo, akkamtaadha. Ragaalee qorannichaa sassaabuuf dirree qoranno keessa turtii ji’a saddeetii taasiseera. Turtiin kunis yeroo hawaasa naannoo qorannichaa (qaama bulchiinsaa, maatii ijollee, hoggantota manneen barnootaa, barsiisotaafi ijollee) waliin walbaruufi eyyama turtii ragaa sassaabbi argachuu, akkasumas, yeroo ragaalee sassaabuuf mirkanoeffachuu dabalata. Qorataan turtiin dirree qoranno keessatti taasise, hariiroo ga’eyyiifi ijollee waliin uummachuufi tapha ijolleen haalaa qabatamaa keessatti taphatan keessatti hirmaachuun ragaalee qorannichaa keessoon (insider perspective) hubachuun akka xiinxaluuf isa gargaareera.

Maddi ragaalee qorannichaa madda ragaa tokkoffaadha. Isaanis, ijoollee, maatii ijoollee (firoota, warteessuu dabalatee), maanguddoota tapha ijolleerratti beekumsa qabaniifi barsiisota. Qorataan aanaalee akka bakka sassaabbii ijootti qorataan filate sadii (Giddaa Ayyaanaa, Gachiifi Najjoo)fi aanaalee akka bakka sassaabbii ragaalee dabalataafi guutiinsaatti gargaarame lamaa (Jimmaa Gannatiifi Waayyuu Tuqaa) keessaan ragaalee qorannichaa sassaabeera. Tokkoo tokkoo aanaalee akka bakkeen ijootti fayyadame sadan keessaa maatiwwan ja'a ja'a, warreen akka bakkeen ragaalee dabalataafi guutiinsaatti fudhate lamaan keessaammoo maatiwwan lama lama waliigalaan maatiwwan 22 filachuun galgala galgalaafi yeroo boqonnaa tapha ijolleen ga'eyyi walii taphatan daawwachuuun ragaa irraa sassaabbatee jira. Aanaalee shanan keessaa ijollee 196 (shamarran 72, dhiira 124) irraa maatii keessatti, bakkeen taphaafi hojii adda addaatti ragaa sassaabbatee jira. Lakkofsi kun warreen garee taphaa keessatti miseensa ta'anii taphatanii daawwatamaniifi dhuunfaanis ta'e garee utuu taphatanii afgaaffii gaafataman dabalata. Tooftaan iddatteessuu iddattoowwaan kun ittiin filataman akkayyoofi darbaa dabarsaadha. Bakkeen sassaabbii ragaalee, ijollee, maatii ijolleefi barsiisota tooftaa akkaayyootiin qorataan kan filate yoo ta'u, maanguddoota tapha ijolleerratti beekumsa cimaa qabanimmoo darbaa dabarsaanin filate.

Daawwaannaan tooftaa ragaa sassaabbii isa ijoo qorannoo kanaati. Irra caalaan ragaalee qorannichaa daawwannaan qorataan tapha ijolleen galgala galgala bakka ga'eyyiin jiranitti, bakkeen hojiifi taphaa adda addaatti

taphatanitti taasiserraan sassaabate. As keessaatti waa'ee yeroo, bakkaafi waqtii taphni itti taphatamuu wantoota ifa naa hintaanefi ibsa/ragaa dabalataa itti barbaadu argachuuf afgaaffii gargaarameera. Kana malees, ilaalcha, fedhii, hubannoo ijolleefi ga'eyyiin tapha taphatamaa jiruufi yoomessasaarratti qaban afgaaffiinin iyyaafadhe. Bifa waliigalaan yoomessa taphaa wantoota daangessaniifi sababasaa barsiisota, maatiifi maanguddootaa marii garee xiyyeffatan sassaabadheen jira.

Adeemsa sassaabbii ragaalee keessatti ragaalee rag-himtootarraa argaman malleen galmeessa ragaalee: yaadannoo dirree fudhachuu, waraabbii sagalee, suursagaleefi suuraa kaasuutti dhimma ba'eera. Ragaalee dirree keessaa yemmuun sassaabu ragaalee bifa sagalee, suursagaleefi suuraaleen fudhachuutti dabalataan, hubannoo, ibsaafi haala yeroo sana argaman bifa yaadannoo dirreetiin barreessaan deeme. Ragaalee guyyaa yookaan galgala tokko bifa sagalee, suursagalee yookaan suuraaleen fudhataman utuun hintursine guyyuma sana barreffamatti deebisaan deemaa ture. Kunis wantoota dubbatamaniifi gochaa raawwataman barreffamatti deebisuu dabalata. Adeemsa kana keessatti haalleen dabalataa yaadannoo dirreerratti qabadhes walbira qabeen ittiin jabeessaa deeme. Kana gochuu keessatti bakka ibsi dabalataa nabarbaachisetti rag-himtootarraa yeroo itti aanutti gaafachuun hubannoo fudhachuunin barreessaan deeme.

Taphoota warreen akka oduu durii ijolleen yoomessa tokko keessatti dabareen kan ofii ofisaanii walitti himan, taphoota raawwilee adda addaa marsaalee adda addaatiin taphataman qabaniifi taphoonni

baay'een walkeessa yeroo tokkichatti taphatamanfaa garuu gaafuma sassaabaman sana barreeffamatti jijiiree xumuruun ulfaataa waan tureef, guyyoottan itti aananitti bulfadhee yeroo dabalataa fudhadheen jijiire. Ragaalee sagaleefi suursagaleen waraabaman irra deddeebiin dhaabaa dhaggeeffachuuifi suuraaleefi yaadannoo dirree waliin walbira qabuun ilaala hubachuunin barreeffamatti jijiire. Xiinxallii ragaalee yaadxina bu'uureffataarratti hundaa'uunin geggesse. Kunis adeemsa sassaabbii keessatti guyyaa jalqabaarraa jalqabee, ragaalee bifa dubbiifi gochaan mul'atan galmeessaa, ibsaafi hiika itti kennaa deemurraa jalqabee ragaalee guyyoota adda addaatti galmeessaa ture irra deddeebiin ergan yaadannoo qabachaa dubbisee booda walitti fiduun ijoowwan (themes) adda baase. Ijoowwan kana rag-himtoota muraasaa waliin mari'achuun sirrummaa isaanii mirkaneesse. Kana booda koodiin itti kenne. Koodii kennamerratti hundaa'uun ijoowwan kanarraammoo yaadrimee adda addaa bu'uuresse. Xumurarratti yaadireewwan kana mata duree adda addaatti quodduun yoomessa taphooni ijollees keessatti taphatamaniifi walitti dhufeenyaa taphaafi yoomessichaa agarsiise.

### **Dhiheessaafi Xiinxala Ragaalee**

Ijolleen akka garee hawaasaatti qooda jirenya keessatti fudhatan niqabu. Qoodni hawaasummaa kunimmoo yoomessa adda addaa keessatti adda addummaa qabaata. Qoodni ijolleen fudhatan mataasaatiin taphachuu danda'uufi dhiisuu, akkasumas, akaakuu tapha isaan taphachuu danda'an murteessa. Fakkeenyaafer yeroofi waqtilee adda addaa keessatti wantoota hawaasni raawwatu ijolleenis akka miseensa hawaasaatti qooda

adda addaa akkasaan fudhatan taasisa. Kunimmoo itti gaafatamummaasaanii ba'achaa taphoota akkam akkamii taphachuun akka mijatuufi hinmijanne murteessa. Kana malees, bakki jirenyaaifi oolmaa ijollees wantoota quoddaanii murteessan keessa tokko. Bakki jirenyaa magaalaafi baadiyyaa ta'uwaliiin kan walqabatu yoota'u, bakki oolmaammoo yeroo boqonnaafi hojii iddo ijolleen itti dabarsan ilaallata. Kanaaf, yeroon, waqtileeniifi bakkeen ijolleen keessa jiraatan itti gaafatamummaa isaan fudhatan murteessun tapha isaaniirratti dhiibbaa qabaata. Kunimmoo taphni ijolle Oromoo Maccaa yoomessa adda addaa akka qabaatu dirqisiisa.

### **i. Yeroo Taphaa**

Ijolleen haalaafi yeroo kamiyyuu keessatti taphachuu nibarbaadu; niyaalus. Dhiibbaan ga'eeyyiirraa dhufu garuu kun akka ta'uuf akka ta'utti hineyyamu. Ga'eeyyiin ijolleen tapha caalaa hojiif dursa akka kennan barbaadu. Akkan afgaaffii Obbo Dheeressaa waliin gaafa 05/03/2013 taasisseefi marii garee maaguddoota magaalaa Haratoo waliin 03/11/2013 taasiserra hubadhetti kun kan ta'u sababa lamaafi. Inni jalqabaa ijolleen tapha yoo baay'isan ga'eeyyi gaafa ta'an, wantoota cimsanii hinilaalan kan jedhuudha. Obbo Dheeressaan dhimma kana "ijolleen tapha baay'istu guddathee nama guddaa hintaatu; inkachachalti" jechuun ibsu. Inni lammataa immoo yaada Smith (2010) isa "ga'eeyyiin taphni ijolle hojiirraa kaachisuun balleessa jedhanii yaadu" jedhuun bifa walfakkaatuun, "Itti gaafatamummaa isaanii haalaan hinba'an" kan jedhuudha. Utuu hojii hojjetanii taphatti fiigu. Yeroo akkasiimmoo hojichi nimiidhama jedhu. Kanaaf, ga'eeyyiin ijolleen tapha

### *Hundumaa D. fi kb*

caalaa hojiif yeroo baay'ee kennanii akka hojjetan fedhuurraan kanka'e yeroo taphaa daangessu.

Ga'eeyyiin yeroo ijoolleen itti taphachuu qaban kan daangessan yoo ta'eyyuu ijoolleen carraa argatan hundaan nitaphatu. Galgala galgala maatii keessatti keesumaa baadiyyaatti ijoolleen taphachaa waarisiiisu. Oromoone Maccaa baadiyyaa jiraatu guutummaatti bifa jedhamuu danda'uun miidhan oomshuufi horii horsiisuun jireenyasaa geggeeffata. Hojiin kunimmoo guyyaa hojjetama. Kanaaf, galgalli yeroo boqonnaa ta'a. Ijoolleenis guyyaa ga'eeyyi hojii gargaaraa oolanii galgala hojiirraa walaba ta'u. Hojiin waan hinjirreef taphachuuf eyyama argatu. Ga'eeyyiin gaaffii ijoolleen yookaan tapha ijolle daawwatanii itti bohaaruu keessa itti hawwatamanii keessatti hirmaachuu danda'u. Kana jechuun garuu ijoolleen baadiyyaa jiraatan guyyaa tapha hintaphatan jechuu miti. Taphooni isaan guyyaa taphatan hojii hojjetan waliin kan walqabatuufi bakka hojiitti hojii hojjechaa kan taphatamuudha. Yeroo baay'ee taphoota guyyaa taphataman keessatti quoda fudhannaan ga'eeyyi akka hinjirre daawwanna turtii yeroo dirree taasiserra hubadheera.

Ragaaleen turtii magaalota bakkeen qorannookoo keessa jiran keessatti taasiseen argadhemmoo, faallaa maatiwwan baadiyyaa jiraataaniin warri magaalaa irra caalaan isaanii hojjettoota mootummaafi daldaaltota ta'u agarsiisu. Kanaaf galgala galgala hojii isaanii dabalataan manatti fidanii hojjetu. Kana malees, ibsaan eleektirikaa jiraachuurraan kan ka'e midiyaalee adda addaa hordofu. Ijoolleen magaalaa jiraatan hojiin isaanii inni guddaan barachuu waan ta'eef, ibsa

### *Jor. Dil. Qor. Adoolessaa-Mudddee 2023, 1(2), 73-97*

eleektirikaa jirutti fayyadamuun barnoota barataa oolan qo'achuu yookaan hoj-manee hojjechuutu irraa eegama. Ga'eeyyiin hojii waan hojjetaniif yookaan midiya hordofuuf, ijoolleen yoo hojii hin qabannee akka callisanii taa'an, midiyaalee isaan waliin akka hordofan yookaan rafan taasisu. Kanarrraa kan hafe gochi kan biraan, tapha dabalatee, akka jeequmsaatti fudhatama. Sababoota kanaaf galgala carraan ijoolleen taphachuudhaaf qaban xiqaadha. Guyyaa guyyaa garuu, ijoolleen yeroo barumsaan alattii irra caalaa taphaan dabarsu. Hojii hojjechaas nitaphatu.

#### **a. Taphoota Galgala Galgala Taphataman**

Bakkeen galgalli hojif hinmijanneefi hojii hinjirretti ijoolleen carraa walabaan taphachuuf argatu. Taphoota galgala taphataman akka kanaa gadiitti xiinxaleera.

#### **Hibboo**

Hibboon taphoota ijolle galgala galgala bifa gaaffifi deebiin taphataman keessaa tokkoodha. Afgaaffii mana obbo Raggaasaatti gaafa 15/04/2013 galgala yeroo daawwanna tapha ijolle maatii waliin taasise keessatti Aadde Naccoon hibboon maaliif galgala akka taphamu gaafatamnii "hibboon galgala yeroo walitti baayyataniitaa taa'an taphatama. Guyyaa ijolle hojii waan hojjetaniif yeroo taa'anii taphatan hinqaban. Guyyaa yoo taphatan 'waraabessatu nama nyaatas' jedhama. Kanaaf, ijolle guyyaa taphachuu insodaatu" deebii jedhu kennan. Dejenenis qorannoosaa hibboo Oromo Walisoorratti bara 2014 taasise keessatti hibboon guyyaa yoo taphatame "ijatu nama jaama" akka jedhamu kaasera. Bifuma walfakkaatuun, Aanaa Gachii ganda Golee Qoraa bakka re'ee tiksanitti gaafa 07/06/2013

### *Hundumaa D. fi kb*

tapha taphachaa turan keessatti Toofiq Bilaaliin hibboo hibbifannaan hibboon guyyaa hintaphatamu jedhee didee biraan deeme. Toofiq “Hibboo” jedhee yemmuu afeeru, Bilaalimmoo “hibboon guyyaa hinjiru, eebbootti si haadiru” jedhee biraan deeme. Kanarraa namni guyyaa hibboo taphanna jedhee isaan gaafatu ijoollee akka nama isaan dogoggorsaa jiruutti waan fudhataniif akka arrabsanii diddaasaaniitiin yeroon yeroo taphichaa akka hintaane akka agarsiisantu ifa.

Kana malees, hibboon qofa qofa, hurrubummaa malee akka hintaphatamne; hurrubummaan kunimmo galgala yeroo hojiin hinjirre kan umaamu ta'uusaatiin hibboon galgala akka taphatamu agarsiisa. Dabalataan, amantaan hibboo guyyaa yoo taphatan waraabessatu nama nyaata yookaan ijatu nama jaama jedhu ijoollee guyyaa taphachuu sodaatanii galgala qofa akka taphatan akka dirqisiisu agarsiisa. Kunis tooftaa ittiin ga'eeyyii ijoollee guyyaa hojii hojjechuu malee hibboo walhibbifatanii akka hintaphanne karaa kallattii hintaanee dhiibbaa geessisinidha.

Faallaa kanaatiin, afgaaffii barsiisaa Tasfaayee waliin magaalaa Giddaatti gaafa 22/05/2013fi barsiistuu Margituu waliin 10/08/2013 magaalaa Najjotti taasiserraa yeroo ammaa taphni hibboo barnoota Afaan Oromoifi Aadaa keessatti hammatamuusaatiin ijoolleen guyyaa daree keessatti akka taphachaa barataniifi daree alattis isa baratan akka walhibbifatan hubadheera. Dhimma kana Dejenen bifaa walfakkaatuun, ijoolleen hibboo erga hojii guyyaa hojjechuu qaban raawwatanii booda galgala akka taphatan eyyamamaaf jedha. Yeroo ammaa garuu haalli kun mana barumsaatti barsiisonni barattoota barsiisuuf

### *Jor. Dil. Qor. Adoolessaa-Mudddee 2023, 1(2), 73-97*

hibboo, oduu duriifi makmaaksotafaa fayyadamuurraan kan ka'e akka jijiirame ibseera. Kanaaf, barsiisonni kutaa keessatti yeroo hunda akka daddamqsiituutti ijoollee akka hibboo wal hibbifataniiif afoola adda adda akka dhiheessan taasisu jedha. Hibboo ijolleen walhibbifatan kana gargaaramanis beekumsa ijolleetti akka dabarsaniifi amala isaanii sirreessuuf akka dhimma itti ba'an ibse (2014). Kanaaf, hibboo barsiisonni akka tooftaa si'eessituufi mala barsiisuutti fayyadamaa turuufi yeroo ammaammoo akka qabiyeteeti sirna barnootaa keessatti hammatamuunsaa ijolleen sodaa malee guyyaa akka taphatan godhee daangaa yeroo taphicharra jiru hambisaa jira. Karaa biraatiin, guyyaa guyyaa ijolleen ga'eeyyii hojii gargaaruun alatti barnootni akka ga'ee jireenyaa tokkootti fudhatamaa dhufuu isaatiin, guyyaa yeroo itti ga'eeyyii hojii gargaaranitti dabalataan yeroo ijolleen ofii isaaniitiifis yeroo qabaatanii yericha sodaa malee taphaaf oolfachuu danda'uu agarsiisa.

Daawwannaa aanaa Giddaa Ayyaanaa ganda Ejeree mana Obbo Raggasaatti gaafa 15/04/2013 galgala taasise keessatti tapha ijolleen taphataa turan keessaa hibboon isa yeroo dheeraa fudhate ture. Ijolleen utuma taa'aa jiranii, gidduutti Rabbirraan “jalqabika” utuu jedhuu dhaga'een qalbiikoo yemmuun achi deebisu Siifan hibboo hibbifachuu jalqabde.

Siifan: Hibboo

Tokkummaa: hibbaka

Siifan: Anoo asin sika'a'ee maalti achi sika'a'e?

Tokkummaa: Buqqee lo'u

Siifan: argatteetta. Ammammo nagaafadhu

Tokkummaa: Hibboo  
Siifan: Hobbaka  
Tokkummaa: Anoo ergaan dhaqaa ati eessa dhaqxa?  
Siifan: Gaaddidduu  
Tokkummaa: Argatteetta; amma immoo Rabbirraan gaafadha. Hibboo Rabbirra  
Rabbirraa: Hobbaka  
Tokkummaa: Ayyoo ko'eettiin bukoo lalfatti bukeessiti.  
Rabbirraa: Indaaqqoo  
Tokkummaa: miti; naagalchi  
Rabbiirraa: Daammuu (takka yaadee yaadee dubbate)  
Tokkummaa: Sirriidha. Atimmoo agaafadhu  
Rabbirraa: Hibboo  
Tokkummaa: Hobbaka  
Rabbirraa: Adeemsa gala hinqabne.  
Tokkummaa: Biyyaa ba'uu  
Rabbiirraa: Hinbarre; naagalchi  
Tokkummaa: Du'a (baay'ee itti yaadaa ture dubbate)  
Rabbirraa: Ammayyuu hinarganne; dafi naagalchi  
Tokkummaa: Hinbeeku; bassaa dhugi (ammas erga baay'ee itti yaade booda)  
Rabbirraa: Ati bassituudha; ani kakkassituudha  
Situ bassee goboxaa'ee anatu dhugee ol utaalee  
Ol utaalee gorroo caalee  
Gamakoo bassatu yaa'aa  
Gamakee faandootu yaa'aa  
Gamakoo xaaxessaa dhaabe  
Gamakee raatessaa dhaabee  
Karrakee hanxaxiin cufee  
Karrakoo danqaraan cufee  
Gufuu gugguuftuu jala ba'ii  
Utuu dhudhuuftuu ganna ba'ii

Karaa mana Garbii  
Lafa jala darbii  
Handaqirra ciisii  
Albaatii gad dhiisii  
Fardi hindannabsuu  
Ani kana caalaa si hin arrabsuu  
Waraabessi adda booqaa si haasallassuu.  
Deebiinsaa Yaadaan deemuu/baduudha.

Akkuma tapha kanarra mul'atu, kan hibbifatuufi deebisu ga'ee waljijiiruun dabaree waliikennaa deemu. Namni lama yeroo walgaafatu warri kaanimmoo taa'anii dhaggeeffatu. Dhaggeeffachuu qofaa utuu hintaane, yeroo namni gaafatamu deebii sirrii hintaane deebisuu, isa hibbifate gargaaranii akka deebiinsaa sirrii hintaane itti himu, yeroonni arrabsamu itti quosanii kolfu. Yeroonni deebii sirrii argatummo jajanii gammaduuf. Dabaree hibbifachuufi deebisuu warra dhaggeeffachaa jiraniin ga'uuf, namoota walhibbifachaa jiran keessa inni hibbifatu yoo mo'e yeroo fedhetti abba barbaade maqaa dhahee "hibboo" jechuun afeeree hibbifata. Yoo namni hibbifatame deebii sirrii deebisemmo ofii nama hibbifatu ta'ee innis nama fedhe filee afeera. Yeroo nama fedhan maqaa dhahanii filatan, caalaatti hibboo sana hinbeeku yookaan deebisuu hindanda'u jedhanii nama yaadan filatu. Sababiinsaas, namni hibbifatamu sun deebisuu yoo dadhabe namni hibbifatu sun nama jabaafi dorgommii mo'atetti ilaalamuun mirga nama mo'ame yookaan deebisuu dadhabe arrabsuu argata. Kana malees, ammas carraa itti fufee hibbifachuun argachuun adeemsa taphichaa keessa tura. Altokko tokko garuu ijooleen taa'anii dhaggeefatan "ammammo anaan gaafadhu, anaan gaafadhu" jechuun carraa

### *Hundumaa D. fi kb*

hibbifatamu walasaamaa gaafatu. Kunimmoo, beekumsa hibboo yookaan dandeettii deebisuu danda'uu isaaniitiin mirgi hirmaannaasaanii akka hindaangeffamne akkaataasaan itti falmatan jiraachuu agarsiisa. Akkasiin dabaree walga'anii hunda hirmaachisu.

Ragaaleen daawwannaan argadhe, harki caalaan ijoollee deebii hibboo gaafatamanii sirriitti kan deebisan ta'uudha. Kunis hibboo galgala galgala yeroo baay'ee deddeebisaanii waan taphataniif baay'een haaraa akka itti hintaane mul'isa. Kanarra darbee dorgommii sana cimaa taasissee mo'achuuf, namni gaafatu hibboo namni gaafatamu sun hinbeekuu jedhee tilmaamu barbaadee gaafachuu qaba. Namni gaafatamuus mo'amuu jalaa ooluuf irra deddeebi'ee yaadee yaala. Itti yaadee deebii garaagarraa deddeebi'ee fidee argachuu yoo dadhabe malee salphaatti harka hinkennu. Dadhabee yoo harka kenne, deebii deebisuu waan dadhabeef akka adabbiitti dhadhaa bassaa "bassaa dhugi" jedhee abbaa hibboof kenna. Inni hibboo hibbifatee deebi'uufii dide, hibboo cimaa dhiheessuu isaatiin cimaa ta'ee nama deebisuu dadhabe sana gatii baasiusuusaatiin akka dhaadatu agarsiisa arrabsoon inni arrabsu. Kanarraa namni hibboo deebisuu dadhabe carraa gaafatamuuf qabu balleessuusaatiin daawwataa ta'uufi gatii baasuunis adabamee dabalataan akka arrabsamtu hubatama. Arrabsoon sun walitti dhufeenyaa isaanii akka hinmiineef inni hibbifatee mo'ate dhumarratti miira arrabsoon ho'e "kana caalaa sinarrabsu" jedhee tasgabbeessuun araarfatee deebii hibbichaa itti himuun xumura.

Karaa biraatiin taphni kun deebiin hibboo dhaabbataa/murtaa'aa ta'uu agarsiisa. Kana jechuun, deebii hibboo ta'uu kan danda'uu kan

### *Jor. Dil. Qor. Adoolessaa-Mudddee 2023, 1(2), 73-97*

gaafataan beekuu malee wanti kanbiraa deebii ta'uu hindanda'u jechuudha. Deebii yeroo hibboon sun kalaqamuu akka deebiitti yaadameen ala deebiin biraan deebii ta'uu danda'u yoo dhihaate fudhatama hinqabu yookaan deebii hinta'u. Hibboon tokko carraa deebii lama qabaachuu hinqabu jechuudha. Hibboo Rabbitraan "Adeemsa gala hinqabne" jedhee gaafateef, deebii Tokkummaan "du'a" jedhee kenne carraa deebii sirrii ta'uun fudhatamuu dhabuunsaa kana agarsiisa.

### **Jimmaa Jimmitee**

Bakka ijolleen jiran hunda taphni jira. Walgeenyaan itti yaadaniis utuu itti hinyaadnis tapha jalqabu. Jimmaa jimmiteenis tapha ijolleen galgala galgala yemmuu walga'anii manatti taphataniidha. Tapha kana keessatti ijolleen dabaree dabareen wal gaafatu/hogganu. Maatiin ijollees tapha kana yeroo ijolleen taphatan akka daawwattootaatti nihirmaatu. Nama mo'ametti kolfu. Altokko tokko taajjabbii isaanii dubbatu. Namni hogganu/taphachiisu "Jimmaa Jimmiitee" jedhee taphicha yoo jalqabu warri kaanimmoo walfaana "jijim" jedhu.

Aanaa Najjoo ganda Yaakkoo Alaltuu mana Obbo Olaanaatti gaafa 03/08/2013 galgala jimmaa jimmitee ijolleen utuu taphatanii daawwadheera. Galgala galgala ijolleefi ga'eeyyiin walga'anii irbaata dura buna dhugaa taphachaa waarsiisu. Namootni guguddaan waa'ee hojji hojjetaa oolanii haasa'aa utuu jiranii Daggafaan "jimmaa jimmitee" jennaan warri kaan walfaana "jijim" jedhanii callisan. Ijolleen jimmaa jimmitee isaanii taphachuu itti fufan.

Daggafa: jimmaa jimmitee

*Hundumaa D. fi kb*

Ijoollee kaan: jijim  
Daggafaa: madaa waraabessaa  
Ijoollee kaan: jijim  
Daggafaa: madaa jaldeessaa  
Ijoollee kaan: jijim  
Daggafaa: madaa qeerransaa  
Ijoollee kaan: jijim  
Daggafaa: madaa waldiigessaa  
Ijoollee kaan: jijim  
Daggafaa: madaa harree  
Ijoollee kaan: jijim  
Daggafaa: madaa gaangee  
Ijoollee kaan: jijim  
Daggafaa: madaa xaddee  
Ijoollee kaan: jijim  
Daggafaa: kuukuluu! amma indaanqoonkoo baarii gama geessee deebitutti namni dubbate madaa bineensota kanaa guuboo sagaltama nyaata. (manni hunduu nicallise)

Ijoolleen hundumtuu walkolfisiisuuf hidhii jabeessanii ciniinatanii ija ija keessa wal ilaalu. Kana gidduutti Guutameen isan kolfaan wal'aansoo qabaa jiru ilaaltee ofisheet sagalee dhageessistee kolfite. Hunduu walfaana, "madaa guboo sagaltama nyaatte" jedhanii furamuu isaaniittis gammadaa itti kolfuu jalqaban.

Ragaa olii kanarraa akkuma mul'atu, namni taphicha hogganu madaa bineensota adda adda waamaa yemmuu deemu ijoolleen kaan "jijim" jedhanii jalaa qabaa deemu. "jijim" jechuunsaanii dubbii hoomtuu hinjiraatu callisa jechuudha. Kunis madaa inni maqaa dha'ee akka adabbii callisa cabsuutti murteessuuf deemutti dhaga'anii waliigaluuf qophaa'oo ta'u agarsiisa. Adabbiin kunis (madaa guuboo sagaltama) ijoolleen utuu hindubbatin yookaan hinkolfin yeroo

*Jor. Dil. Qor. Adoolessaa-Mudddee 2023, 1(2), 73-97*

murtaa'eef (amma indaanqoonsaa baarii geessee deebitutti) yoo turuu dadhaban kan muramuudha. Bineensonni maqaa dhahaman warra foonisaanii hinnyaatamneefi bifaa adda addaan miidhaa namarraan ga'anii ta'uun, isumayyuu raqaasanii nyaachisuun adabbiin sun ulfaataa ta'u agarsiisa.

Tapha kana keessatti yeroon kaa'ame dhumeed hinargine. Kanaaf dheera yerichaa tilmaamuu waan danda'amu miti. Yeroon kennname kun dhumuu baatus namni hangi inni obsu murtaa'aa waan ta'eef, muddama sana namni obsuu dadhabee callisa ajajame cabsee mo'ame xumura taphichaaf sababa ta'a. Namoonni haalleen akka isaan dubbatan yookan kolfan dirqisiisu keessa obsanii callisanii turanimmoo taphicha mo'atu. Mo'unsaanii garuu mo'amuu nama tokkoon kan argame malee, yeroo kennname sana callisaan fiixusaaniin miti. Namni mo'ame raqa yookaan madaa safaraan himamee irratti waliigalame nyaata. Madaa hanga jedhame baay'atu, madaa bineensota fayyaattu hinnyaatamne, sana nyaachuusaatiin immoo itti kolfama. Raqa kana nyaachuun, obsa dhabuun yookaan haalleen rakkisoo mudatan keessatti miira ofii to'achuu dadhabuun waliigaltee diiguun waan hinmalleen, jibbisiisaafi hawaasa biratti ciiggasisa ta'een rukutamuu yookaan adabamuuf akka mallattummaatti dhaabbata. Mucaan taphicha hogganu callisni sun jalqabuu labsee, "kuukuluu" jedhee iyaa indaaqqoo dhageessisee hanga indaaqqoonsaa Baarii geessee deebitee akkas jettee iyyitutti akka turu hima. Iyyi indaaqqoo barii lafaa akkuma labsuun callisa hirribaa keessaa dammaqsu, indaaqqoo Baarii geessee deebitee yoo iyyite qofa callisa kanarraa furamu ijoolleen kun.

### *Hundumaa D. fi kb*

Iyyi indaaqqoo kun yeroo xumura taphaa agarsiisuuuf kaa'amuun yeroon taphni kun taphataa jiru galgala ta'uufi barii (yeroon xumura callisaa yookaan dukkanaa)tiif akka mallatummaatti dhaabbata jechuudha.

### **b. Taphoota Guyyaa Taphataman**

Ijoolleen guyyaa guyyaa haalleen adda addaa keessatti tapha walii isaanii wajjin nitaphatu. Taphoonni guyyaa taphataman kun kanneen galgala taphachuuf hinmijanneefi hojii isaan guyyaa keessatti hirmaatan waliin kanneen walqabataniidha. Taphoonni ijoolleen guyyaa walii isaanii wajjin taphatan baay'een isaanii haala qilleensa guyyaa sana jiru waliin kanneen walqabatan, yeroon hojii dafee akka darbu kanneen tumsaniifi ijoollee maatii adda addaarraa walitti dhufan gidduutti adeemsifamuun kanneen beekamaniidha.

### **Yaa aduu ba'i ba'i**

Ijoollee xixiqoon naannoo manaa taphatan tapha isaanii haala qilleensa jiruu waliin walqabsiisanii yeroo taphatan nijira. Haalli qilleensa isaan keessa jiran qorra/duumessa yoo ta'ee tapha isaaniin ho'a/aduu, yoo aduu ta'emmoobokkaa waamu. Fakkeenyaaaf daawwaanna gaafa 20/11/2013 ganama tiifuu bokkaa keessa aanaa Waayuu Tuqaa ganda Burqaa Baabbuutti tapha ijoolleen naannoo mana jirenya isaaniitti taphatanirratti taasisseen ijoollee shan ta'anii fuuldura manaatti walqabatanii "yaa aduu ba'i ba'i, ijoollee gammoojjii badduu baasii ba'i" jechaa ol utaalaniidha weeddisan hordofeera.

Taphni kun tiifuu keessa ta'uusaatiin qilleensi ture qorraadha. Ijoolleen tapha kanaan qorraa jiru miliquuf taphatu. Sochiin qaamaa isaan taasisan (walqabatanii ol

Jor. Dil. Qor. Adoolessaa-Mudddee 2023, 1(2), 73-97  
u'utaalanii sirbuun) qaamni isaanii ho'a maddisiisee akka qorra danda'amatan isantaasisa. Weedduu isaaniitiinimmoo aduun dhuftee/baatee ho'a isheen akka qorra ariituuf waamu. Kanaaf haala qilleensa keessa jiranirraa ka'e ho'i isaan barbaachisuufi sana argachuufimmoo madda ho'aa yookaan aduutti ho'ashee fiddeefii akka mul'atuuf bifaa weedduu waamicha dhiheessuuf. Waamicha kanaf utaalchaan itti olsiqaa aduunis akka itti gadi itti dhuftuu bifaa hawwachuu fakkaatuun taasisu. Kunimmoo abdii aduun inbaati jedhutti dabalamii ho'a argamsiisaaf. Tapha kana yeroo yeroo qorraafi ho'a isaan barbaachisu hunda nitaphatu jechuudha. Aduun kan baatu guyyaa waanta'eef taphni aduun akka baatuuf afeeru kan guyyaa taphatamuudha jechuudha.

### **Injiraan Awwaaluu**

Ijoolleen guyyaa guyyaa hojii adda addaa keessatti qooda fudhatu. Hojiawan tokko tokko qofaa yookaan nama muraasa ta'anii hojjetu. Hojiin akkasii baay'atee yookaan itti ulfaatee issaan dadhabsiisuu danda'a. Yookaanimmoo yeroo dheeraa fudhatee bakka tokko tursiisuu nuffisiisuu danda'a. Yeroo akkasii haala sana keessa dafanii ba'uu yookaan yeroon sun akka dafee dhumeeduu aduun dhihee galan barbaadu.

Daawwanna gaafa 03/10/2013 aanaa Najjoo ganda Yaakkoo Alaltuutti laga Alaltuutti Tolaafi Nuuraan utuu sa'a waliin tiksaniitaa'anii ulee isaaniin lafa qotuuyyuun argee dhaqee bira taa'e. Yemmuun dhaqee bira taa'u, kokkolfuu jalqaban. Maal kolfitu jedhee gaafannaan ammas cal jedhanii kolfan. Hoomaa natti himuu didnaan "maaliif lafa qottu?" jedhee gaafadhe. Nuuraan "ofumaati"

naan jedhe. Isa ani jedhu akka nama hindhageenyee “eessa keesse?” jedhee waa gaafate Tolaan. Nuuraanis “kunooti dhagaa kana jala jira” jedhee dhagaa xiqqaa battee tokko itti agarsiisee. Maaltu jira dhagicha jala jedhee fuudhuuf jennaan “dhiisaa, dhiisaa” naan jedhan walfaana. Ammas maaltu jiran jedhe. “injiraan” naan jedhe Nuuraan. Maal gootu jennaan “as keessa awwaalla” naan jedhe. Maaliif jennaan “akka aduun dafee dhihuuf” jedhe. “Dhiheehoo” ittiin jennaan, Tolaan “dafeen manatti gallee boqonnaka” jedhe. Injiraan essaa fiddaan jedhee gaafannaan, Tolaan “mataa Nuuraa keessaa injirre” jedhe. Nuuraanis kolfa “insoba mataasaa keessaa injirre” jedhe.

Kanarraa ijoolleen guyyaan itti dheerate dafee dhiheefii manatti akka galaniif injiraan mataa isaanii keessaa funaananii boolla qotaanii akka awwaalantu hubatama. As keessaatti ijoolleen mataa isaanii keessaa injiraan funaanuifi boolla qotuutti baay’ee ko’ommatanii hojjetu. Kunimmoo dheerina yeroo isaan dabarsaa jiranii dagachiisee waan yeroon ariifate itti fakkeessa. Kanaaf taphni kun guyyaa dheeraa nuffisiisa dagachiisuun salphiisuufiitti dabalataan rifeensa mataasaanii qulqullinaan akka qabatan tumsa jechuudha.

### **c. Tapha Waqtileen**

Qooddiin waqtilee haala qilleensaarratti hundaa’a. Haalli qilleensaammoo hojii yeroo sanatti hojjetamu, akkamitti akka hojjetamu, maal akka uffatamu, baay’inaan maal akka nyaatamufaa murteessu. Kunimmoo waqtileen akkaataa jiruufi jirenyaaarratti dhiibba qabaachuu isaanii agarsiisa. Qaama jiruufi jirenyaa kan ta’e tapha ijolleerraanis dhiibbaa nigeessisu. Ijolleef taphni qaama jirenyasaaniiti. Hariiroon isaan ga’eyyi

wajjin qaban garuu taphatti dabalataan qooda kan biraa akka qabaatan isaan dirqisiisa. Kanaaf, ijoolleen tapha taphachuun alatti itti gaafatamummaa ga’eyyiin qoodaniif qabu jechuudha. Itti gaafatamummaa kana yemmuu fudhatan garuu guutummaatti tapharrraa fagaatanii miti. Hojii kennameef hojjechaa tapha isaaniis taphatu. Walumaagalatti, ijoolleen tapha addatti taphachuun yookaan hojii hojjechaa taphachuun danda’u jechuudha.

Taphootni hojii waliin walhinqabanne yoo haalli qilleensaa dhiibbaa irratti hinqabu ta’e waqtileen hindaangeffaman. Taphoonni akkasii baay’een isaanii isaan mana keessatti taphatamaniidha. Fakkeenyaaaf hibboonfaa mana keessatti waan taphatamaniif, galgala galgala waqtii kamiyyuu keessatti taphatamuu danda’u. Taphoonni alatti taphatamaniifi hojii hojjechaa taphataman baay’een isaanii haala qilleensaafi hojii waqtii ta’e keessatti hojjetamuun dhiibbaan waan irra ga’uuf waqtii keessatti taphachuuf mijatu qofaa keessatti taphatamu jechuudha. Kanaaf, taphni ijolle Oromoo Maccaa kanneen waqtilee eeggetanii taphataman jiru jechuudha.

### **Taphoota Ganna Taphataman**

Taphoonni waqtii gannaa keessa taphataman baay’inaan warreen sochii qaamaa waliin walqabataniidha. Sababiinsaas, roobni roobee lafti jiidhee marga waan qabuuf ijoolleen yoo kufan hinmiidhaman. Daawwanna turtii dirree qoranoo keessatti taasiserraak akkan hubadhetti, taphoonni ganna taphataman warreen akka wal'aansoo, dhiitichoo, wal'ariisaafi tuulloofa'i. Taphoota kana yeroo taphatan kufuu yookaan wal kuffisuu waan of keessaa qabaniif ganna taphachuun miidhama kanarraa dhufu hambisa. Kana malees, roobni

### *Hundumaa D. fi kb*

rooburraan kan ka'e bishaan bakka hundumaa jiraachuun taphootanni mijaatuufis nijiru. Fakkeenyaaaf roobee lola'ee dirreerra yeroo bishaanni ciisu, ijoolee keessa fiiganii miillaafii harkaan yookaan uleen rukutanii walitti facaasanii taphatu. Bishaan walitti facaasan kanaan uffataafi qaama walii jiisanii tortorsurra darbanii, fuulatti wal facaasanii ija, funyaaniifi afaanitti yemmuu nam'u jonja'anii kukkufu. Miira kanarraa uumamutti gammadanii kolfu.

Roobni ganna roobu yaatuwwaniifi lageen hangi bishaan isaan qabanii akka dabalu waan godhuuf ijoolee baay'inaan daakaa daaku. Ijoolee xixiqoon baay'inaan yaatuwwan bishaan isaanii humna isaanii ol hintaaneefi lageenimmoo gara tuujjuba hintaane daakuun lageen gurguddoo ta'an daakuu itti shaakalu. Ijoolee xixiqoon warra gurguddaa wajjin bishaan daakuu hinfilatani. Gara tuujjubaatti geessuun akka bishaanin liqimsaman godhanii waan itti kolfiniif. Daawwannaa gaafa 04/10/2013/magaalaa Najjoo laga Alaltuu bakka daakaa Gafaree jedhamutti taasiseen, Abraam (umrii 15) Nuuraa (umrii 7) "kottu sin daaksisaa" jedhee waamee harka lamaan diriirsee garaa Nuuraa jala qabee bakka tuujjubaatti geessee utuu daaksisaa jiruu harkasaa jalaa fudhate. Yeroonni harka jalaa fudhatu Nuuraan tuujjuba keessa dhidhime. Ana dabalatee ijoolee achi jiran naanee yeroo itti wacnu, Abraamiifi gareensaa warri gurguddaan ijoolleen warri kaan muuxannoo kana akka qaban bifaa fakkaatuun gara kootti garagalanii ana amansiisuuf "hoomaan hinta'uum, inba'a, inba'a" jedhan. Achii Nuuraa karaa seennerraa gadi siqee mataa urgufachaa yemmuu mul'atu Abraam qabee

### *Jor. Dil. Qor. Adoolessaa-Mudddee 2023, 1(2), 73-97*

baase. Achii Nuuraa afaaniifi funyaan isaan bishaan coccobsee joonjiin erga irraa galee booda boo'aa uffatasaa uffatee galuuf karaarra bu'ee qajeele.

Kana maleees, ijoolleen yeroo uffata baafatanii daakuuf bishaanitti nam'an waljala deebi'anii uffata waliin waldhoksanii walrakkisuunis qaama tapha laga daakaati. Kanas, daawwannaan gaafa 05/10/203 laguma Gafaree kanatti taasiseen hubadheera. Gaafas Caalaan (umrii 8) uffataa isaa akkuma warra kaanii ofirraa baasee diida ka'atee daakuuf yemmuu bishaan seenu, Biqilaan (umrii 13) suuta jedhee sassaabee dhaqee Alaltuufi jajjaba walmakee gobbathee qarqara galaanichaan gara gadii jiru keessa dhokse. Gocha Biqilaan kana Caalaarraa kan hafe ijoolee warri kaan organii walitti agarsiisaniiru. Daakaanii quufanii hunduu yaa'ee yemmuu uffatasaa uffatu, Caalaan kan ofii dhabe. Barbaadee dhabnaan tokko tokkoon waamee isaan gaafachuu jalqabe. Namni argeera itti jedhu dhibnaan callisee ta'e. Namnuu utuu itti hinhimin hunduu gara gara manasaatti galuu ka'e. Caalaan qullaasaa akkatti galu dhabee bo'aa barbaaduu jalqabe. Erga fagaatanii booda Biqilaan sagalee olkaasee bakka dhokse itti himnaan dhaqee fudhatee isaan biraa hafee qofaa gale. As keessatti Caalaan miira aarii cimaa keessa seenuyyuu walumatti arrabsuu malee eenyuunuu hoomaa gochuu hindandeenye. Aariisa keessatti qoosaafi baacoo isaan itti agarsiisan obsuu malee fala kan biraa dhabe. Kunimmoo miiraassaa to'atee ijoolee hiriyyootasaa waliin akka taphatuufi jiraatu isa dandeessisa.

Daakaan ganna ijoolleen daakan kun kan bona daakanirraa akeeka isaan adda

### *Hundumaa D. fi kb*

addummaa qaba. Afgaaffii obbo Gaarummaa waliin gaafa 23/04/2013 taasiseen daakaan tapha ijoollee keessaa tokko ta'uu ibsuun "Ganna laga guutee humnaan yaa'u daakaanii dandeettii daakaa cimsatanii daaktuu ta'u. Ijoolleen daakaa baruu qabdi; yoo karaa deeman galaanni itti guutee karaa hinbulani. Bona yeroo caamsaan cimus ijoolleen laga buutee bishaan daaktee qabbaneeffatti. Ijoollee warri daakaa hinbeekne bona bishaan garaa barti" yaada jedhu kennan. Daawwannaafi yaada kanarraa ijoolleen ganna galaanaa yookaan bishaan humna guddaa qabu waan argataniif dandeettii bishaan daakuu horachuufi gabbifachuuf akka daakanifi adeemsa kana keessatti warreen ga'umsa daakaa qaban ofii daakanii bashannanuun cinatti warreen hindandeenye akka shaakalsiisaniidha. Bona ammoo ho'a miliquufi bashannaanaaf, akkasumas bishaan humna cimaa waan hinqabnee ijoollee xixiqoon daakaa shaakaluu yeroo itti jalqaban akka ta'etu hubatama. Hurrubummaan yeroo daakaa jirus qaama tapha sanaati. Yeroo ijoolleen bishaanin liqimsaman, ukkaamaman, bishaan walitti facaasanii, bishaan keessatti walgatanii/kuffisanii walitti kolfu, waljajuu, waljajjabeessuufi waloolchuu haalaan mul'ata.

Nyaatni waqtii ganna ga'uus tapha yeroo kana taphatamuuf sababa ta'uu danda'a. Fakkeenyaa, boqolloo boneen ganna asheeta isaa waadamee, afeelamee yookaan akaa'amee nyaatama. Haaluma kanaan, Aanaa Waayyuu Tuqaa ganda Burqaa Baabbuu mana obbo Ittafaatti gaafa 07/10/2013 galgala daawwanna taasiseen keessatti ijoolleen isaanii (Gammachu, Taliila, Taliilee (Taliilaafi Taliileen lakkudha) Caaltuu, Sooromeefi siddiseen) ija boqolloo amma ta'e

### *Jor. Dil. Qor. Adoolessaa-Mudddee 2023, 1(2), 73-97*

barruu harkaa keessa dhossanii meeqa akka ta'e akka tilmaaman walgaafachuu tapha meeqoo taphachaa turan. Walumaagalatti, jijiirama haala qilleensaan walqabatee mul'atu (rooba, qorra), dacheen laafuufi margaa uffachuun, gosti nyaata nyaatamuufi hojji hojjetamuu taphoonni addatti ganna taphataman akka jiraatan taasisa.

### **Taphoota Birraa Taphataman**

Waqtii birraa keessa taphoota baay'eetu taphatama. Akka marii garee maaguddotaafi ga'eeyyii magaalaa Haratoo gaafa guyyaa 03/11/2013fi aanaa Giddaa Ayyaanaa gaafa 07/03/2013 taasiserra hubadheetti, birraan waqtii ganni duumessaan dukkanaa'ee namatti ulfaatu darbee ifni aduu daraaraafi firii biqiltootaan walunee itti mul'atu waan ta'eef barii lafaatti fakkeeffamee gammachuun nama guuta. Kanarraan kan ka'e birraa ijoollee qofa osoo hintaane ga'eeyyii keesumaa immoo dargageessaafi dargageettiyyuu sirbaafi taphaaf kakaasa. Birraan yeroo bari'u ijoolleen taphoota gosa adda addaa taphatu.

Taphoota yeroo birraa ijoolleen taphatan keessa tokko waldhokachoodha. Taphni kun kuukkuu/akuukkuun jedhamuunis nibeekama. Ijoolleen kaan dhokatanii namni tokko isaan barbaada. Hanga warri dhokatan bakka hinargamne qabatanitti mucaan barbaadee ari'ee qabuuf qophaa'u fuula qabatee dunuunfatee dhaabata. Warri dhokatan erga bakka tolfatani booda mucaa/mucayyoon qabuuf ari'u ari'uu jalqabuuf "Akuukkuu yookaan kuukkuu/dhufuu" jechuun barbaaduuf qixaa'anii dhokachuusaanii gaafata. Warri dhokatanii jiranii "kuuti/koottu" yemmuu jedhan barbaacha jalqaba. Waqtii birraatti midhaan, margifi biqiltootni lafa uffisaanii

### *Hundumaa D. fi kb*

nama dhoksuuf mijatoo waan ta'aniif ijoolleen akka garasaanii keessa waldhokataanii taphachuu danda'u.

Midhaanni ganna faca'ee birraa bilchaate bineensota akka qalamee, jaldeessa, booyyeefa'iin akka hinmancaaneef eegamuu qaba. Itti gaafatamummaan midhaan bineensota kanarraa eeguummoo yeroo baay'ee ijoolleef kennama. Kanaaf ijoolleee yeroo birraa tapha isaan taphatan keessaa tokko tapha lafa midhaan eeguuti. Taphoonni kun kan itti bineensota kana arraabsan, akka midhaan isaanii hinnyaaneef kan sossobatan fakkeessanii ittiin mukuu ba'anfa'i. Kan ittiin ijoolleee akka isaanii midhaan eegaan jiran waamanii ittiin arrabsaa taphatan fa'i. Taphoonni kun bifa weedduun taphatamu. Yeroosaan sagaleesaanii dhageessisanii weeddisan bineensonni kun midhaan bira jiraachuusaanii waan beekaniif itti seenanii hinnyaatani. Fakkenyaaf, daawwannaa gaafa 04/06/2013 aanaa Gachii ganda Golee Qoraa bakka Jibriiliifi Abdoonfaa midhaan eeganitti Jibriiliifi Abdoon gamaafi gamana midhaan eegaa jiran bira dhaabbatanii akkaataa eeguu isaanii weedduun walqeeqan.

Jibril: Abdoo gannootee qalameen sijalaan gad lootee agadaafi boqolloo oromee xab goote

Abdoo: Jiboo dullattii qalameen gamakeen mul'attii adda keetti ejjettee funyaan keetti ejjettee agadaafi boqolloo cuffatti.

### **Taphoota Bona Taphataman**

Bonni waqtii roobni hinjirre ta'uusaatiin waqtii gogiinsati. Kan jiidha yookaan dhoqqee hinqabne ta'uusaatiin ijoolleee akka garaasaanii lafa taa'uu danda'u. Kanaaf taphootni lafarrtaa'uun taphatama waqtii kana keessa

### *Jor. Dil. Qor. Adoolessaa-Mudddee 2023, 1(2), 73-97*

baay'inaan intaphatamu. Ijoolleen waqtii birraa keessa saddeeqaafi shanee/qellemooshee lafa ga'anii tataa'anii taphatan waqtii bonaa keessas cimsanii taphatu. Taphoonni akka ashagaagiroofi ajeessoo lafa diriifatanii taa'anii taphatanis waqtii bonaa keessa taphatamu.

Qellemooshee yookaan shaneen tapha dhagaa xixxiqqoo boca babbareedaa (geengoo) qaban shaniin taphatamuudha. Kanaaf bakka tokko tokkotti (Najjoo, Giddaa) shanee jedhamuu waamama. Gaafa 19/05/2013 Jamila Jabal, Moomina Nasiruifi Faaxumaa Nasiruu naannoo mana jireenyaa isaaniitti taphicha lafa walitti naanna'anii taa'anii utuu taphatanii daawwadheera. Ijoolleen walitti naanna'anii taphatan kun taphicha dabaree dabareedhaan wal harkaa fuudhanii taphataa turan. Yeroo abbaan dabaree dogoggoru (furshaa'u) nama itti aanutu dabaree fudhata. Namni taphicha mo'ate nama isatti aaneetaa'ee dabaree irraa fudhaturrattii adabbii lakkoofsisaa deema. Tapha tokko yemmuu mo'u qabxii shantu irratti lakkaa'ama. Namni deddeebi'ee mo'amee adabbii baay'een irra jiru, jabaatee mo'uun adabbii irra jiru galchuu qaba. Akkasiin wal adabaafi waliin galchaa deemanii dhumarattii namni qabxii guddaan irratti lakkaa'ame mo'ama. Mo'amuu isaarraan kan ka'e "raammoo nyaatta" jedhanii itti kolfu. Tapha ijoolleen kun taphataa turan keessatti tapha jalqabaatiin Faaxumaan raammoo nyaatte jedhanii yemmuu isaan itti kolfan; maaliif akkas jettaniin jedheen gaafadhe. Jamilaan ariifattee "inmo'amtekaa; mo'amnaan raammoo nyaatti" jettee naaf deebifte. Raammoon waan jibbisiisaa waan ta'eef dorgomanii mo'achuu dadhabuu

### *Hundumaa D. fi kb*

yookaan mo’amuu akka waan jibbisiisaa kana nyaachuutti lakkaa’uu isaaniiti.

Taphni kun toora taphichaa yaadatanii eegaa taphachuu (sadarkaa jalqabaarrattii dhagaa arfan tokko tokkoon funaanuu, lammatarratti dhagaa arfan lama lamaan funaanuu, sadaffaarratti dhagaa arfanuu altakkaan kaasuufi dhumarratti dhagaa shananuu walfaana oldarbuu dugda lamaanirra harkaarratti qabuu), dhagaan oldarbatamee deebi’ee yeroo keessatti dhufu sirriitti tilmaamuun utuunni lafa hinbu’iin dhagaa warraa lafaa fuudhanii deebi’anii walitti qabuu, dhagaa hundaa walfaana oldarbatanii dugdaa harkaa lamanii diriirsanii irratti qabuu danda’uufaa gaafata. Kunimmoo dorgomaa cimaa ta’uuf utuu hindagatiin xiyyeffannoон taphachuu, taphicha keessatti tilmaama yeroo raawwii danda’uu dirqama ta’uu agarsiisa.

### **Taphoota Arfaasaa Taphataman**

Arfaasaa roobni roobuu jalqabuusaatiin margi biqiluufi biqiltoonni latuu jalqabu. Beeladootni, bineeldotniifi ilbiisonni miidhama bonni isaanirra geessiserraa bayyaannachuu jalqabu. Ilbiisonni akka billaachaafaa waqtii arfaasaa baay’inaa dirreerra balali’u. Ijoolleenimmoo ilbiisota kana ari’anii ajjeesuufi yookaan qabanii ballee irraa ciranii balalii dhowwuuf duukaa fiigaa oolu. Tapha kana keessatti dorgommii kan ta’u ilbiisa hangamii ari’anii akka qabaniidha. Gaafa 02/09/2013 aanaa Najjoo ganda Yaakkoo Alaltuutti ijoolleen Tolaa, Nuuraafi Caalaa jedhaman bakka horii tiksantti tapha isaan boombii adamsaa taphatan daawwadhe keessatti, jalqabarratti boombii gurraacha baalleen ka’u “budaa budaa” jedhanii yeroonni qubatu uleen rukutanii ajeesuuf faana fiigu.

### *Jor. Dil. Qor. Adoolessaa-Mudddee 2023, 1(2), 73-97*

Altokko tokko walfaana tokko duukaa fiigu. Yeroo tokkoo ol arganimmo kan ofii ofiisaanii ari’u. Yeroo ajjeesan lakkaa’achaa deemu. Namni boombii baay’ee ajjeese akka goota cimaatti ilaalamee akka mo’atetti saadama.

Tapha kana keessatti maaliif budaa akka jedhanii adamsan gaafannaan Caalaan boombii ajjeesee lafa jiru natti agarsiisaa “kunoo ijashee inagartanii akkasheen fokkistu, horii keenya nyaachuu dhufte, fuutuu wayitii barristee dhuftee horii dhorti kanaaf ajjeesna” naan jedhe. Kunis kan agarsiisuu ijoolleen boombii akka uumama badaa horii miidhuutti lakkaa’anii akka dhabamsiisuuf ari’aniidha.

### **ii. Bakkeen Taphaa**

Taphni qaama jiruufi jirenya ijoollee waan ta’eef, bakkeen itti ijoolleen jiruufi jirenya geggeesuuf seenan hunda taphni nijiraata. Jiruufi jirenyi kunimmoo walitti dhufeenyga’eeyyii wajjiniifi walii issaanii gidduutti taasifamu of keessa qaba. Walitti dhufeenyi ga’eeyyii wajjinii qooda hojii ga’eeyiirraa dhufu akka qooddatanifi achi keessatti akka to’ataman kangodhu yoota’u, kan waliisaanii gidduu garuu ga’ee itti gaafatamummaa hordofsiisu kan hinqabneedha. Kanaaf, ijoolleen bakkeen gahee ga’eeyiirraa qooddatan itti raawwataniifi sanarraa bilisa ta’e keessa jiraatu jechuudha. Kun immoo bakkeen itti hojii hojjetaniifi hojiirraa walaba ta’e akka qabaachuu danda’an agarsiisa.

Ijoolleen bakkeen hojii keessatti hojjetan keessattis ta’e hojiirraa walaba ta’an keessattis nitaphatu. Bakkeen hojii hojjetan keessatti hojicha taphaaf mijeffachuu, yeroo taphaaf ta’u hambifachuun yookaan yeroo boqonnaa qabaatanitti taphatu. Yeroo hojiif mijataa

hintaane bakki ijoolleen turan akka bakka taphaatti isaan tajaajila. Kana malees, ijoolleen yeroo hojiirra bilisaa ta'e yeroo qabaatanitti bakkeen itti dabarsan adda addaa qabaatu. Kanaaf, ijoolleen bakkeen hojii, turtii yookaan boqonnaafi bakkeen taphumaaf hafan fa'itti taphatu.

#### a. Bakkeen hojii akka bakkeen taphaatti

Turteen dirree qorannoo keessatti taasiseen hojiin ijoolleen Oromoo Maccaa hojjetan irra caalaansaa barnoota barachuufi maatii hojii gargaaruudha. Bakkeen hojiilee kana hojjetanitti yeroo boqonnaa qabaataniifi hojichuma hojjechaa taphachuu danda'u. Bakkeen kunis manneen barnootaa, naannoo manaa, bakkeen tikaa, bakkeen eeguu midhaaniifi lagni qoraanii fa'i.

#### Manneen Barumsaa

Ijoolleen barnoota barachuuf bakkeen adda addarraa walitti dhufu. Daawwannaan manneen barnootaa Ejeree sadarkaa 1<sup>ffa</sup>, mana barumsaa Gachii sadarkaa tokkoffaa, mana barumsaa sadarkaa 1<sup>ffa</sup> Ulaa Jimmaafi mana barumsaa sadarkaa 1<sup>ffa</sup> Burqaa Baabbuu taasisefi afgaaffii barattootaafi barsiisota waliin taasiserraaj ijoolleen daree keessattiifi dirreerratti akka qaama barnootaattiifi dareen alatti yeroo boqonnaa akka bohaartiitti taphoota adda addaa akka taphatan hubadheera. Afgaaffiin barsiisaa Addisu, Barsiisaa Fufaafi Barsiistuu Almaaz waliin taasisee, ijoolleen manneen barumsaa isaanitti barnoota Afaan Oromoo keessatti taphoota ijoollee warreen hibboo, Oduu durii, sheekkoowwan, faaruuleefi sirboota addaa addaa akka qaama afoolaatti akka baratan agarsiisa.

Mana barumsaa sadarkaa tokkoffaa Ulaa Jimmaatti gaafa 15/05/2013 barattootni kutaa lammaffaa barnoota ispoortiif dirreetti ba'anii barsiistuuun isaanii "Asiin na baasii" akka taphatan ajajje. Haaluma ajajamaniin, taphicha ijoolleen baay'atanii harka walqabachuun geegoo uumuun, namni tokko geengoo sana keessa seenee bakka isaan harka walqabatan, barruu isaa lamaan walitti qadaaduun rukutaa gidduu naanna'ee "Asii na baasaa" jechuu jalqabe.

Asiin nabaasaa

Sibaasnuu

Asiinoo?

Sibaasnuu jennaan bakka ijoolleen harka walqabatan gidduu rurrukutaa erga naanna'aa ture booda, "Biddeen naa kennaa" jechuun gaafachaa naanna'uu itti fufe. Isaanimmoo 'hinjiru' jedhuun. Utuma naanna'uu kanneen dagatanii dhaabbatan argatee harka isaanii rukutee gargar baasuun fiigee marsaa sana keessa ba'e. Yeroo kana hunduu qabuuf faana fiige. Baqatee baqatee utuu hinqabamin bakka ka'etti deebi'e. Kun ta'uusaatiin mo'ataa ta'e. Mo'achuusaatiin mucichi ammas deebi'ee geengoo sana keessa seenee taphicha taphachiisuu eegale. Achii booda marsaa itti aanutti yeroo cabsee ba'u ari'amee qabamee dabaree mucayyoo isa qabdeef dabarse. As keessatti ijoolleen jabeessanii walqabanii karaa ba'aa dhowwachuu, rukutanii harka gargar baasanii cabsanii ba'uu, ari'anii qabuufi miliquin barnoota ispoortii keessatti qaamaa jabeeffatu jechuudha. Walumaagalatti ragaalee kun mana barumsaatti ijoolleen daree keessaafi alatti taphoota adda addaa kaayyoolee adda addaaf akka taphatan agarsiisa.

### Manaa keessaafi Naannoo Manaa

Oromoo Maccaa keessatti ijoolleen durbaafi xixiqfoon manarraa fagaatanii baay'ee hindeeman. Ijoolleen durbaa naannootii wal waamanii baayyatani qoraan cabsuufi bishaan waraabuu laga indeemu. Yeroo kaan garuu manuma hojii mana keessaafi hojjechaa ijoolleen xixiqpoonimmoo mana eegaa naannoo manaa taphatu. Galgala galgala manatti garuu yoo hojii mana keessaafi fixan ijoollee dhiiraa guyyaa bakkee oolanifi daa'imman xixiqqoo tarii ga'eeyyiis dabalatee waliin nitaphatu.

Itti gaafatamummaa ga'eeyyiin ijolleef kennan keessaafi tokko mana eeguudha. Naannoo qe'eetti ijoolleen itti gaafatamummaa kana ba'aa taphatu. Marii garee gaafa 22/09/2013 aanaa Najootti taasisne keessatti aadde Dammeen dhimmaa kana "ijoolleen jabiifi hoolaa tiksuum hingeenye; ergaa dhaquu hindandeenye, mana bira teessee taphashee taphachaa mana eegdi. Amma walirra jirtutti waliishees waleegdi. Kanaa gootee gatii buddeenaabaafti" jedhan. Kanaaf, joolleen naannoo qe'eetti taphattu yeroo baay'ee warreen umrii xixiqqoo waggaa afuriifi isaa gadiiti. Sababiinsaas ijolleef kunneen warreen mana barumsaa hingalle, hojii manarraa fagoo (fkn horii tiksuu, midhaan eeguu, qoraan funaanuufaa) hojjechuu hindandeenyeafi ergaa ergamuuf hingeenye waan ta'aniif naannoo manarraa akka hinfgaannee taasifamanii achumatti taphatu.

Ijoolleen maatii tokkoo qofti mana eegaa waliin mana isaanii biratti taphachuu danda'u. Manneen ollaan ta'an yoo jiraatanimmoo ijoolleen sun mana abba tokkoo biratti yookaan gidduu keessatti walitti dhufanii

taphachuu danda'u. Taphoonni ijoolleen mana eegaa taphatan qellemooshee/shanee, qodaqodee, waldhikachoo/akuukkuu, abbaa manaa haadha manaa fa'i. Taphoonni kun irra caalaatti taphoota cimina qaamaa hingaafanneefi akkeessaa ta'aniidha (muukeen, dhagaa, moofaa mi'a mana keessa/qodaatti fakkeessuu, qooda abbaa, haadha, obboleessaafi obboleetti taphachuu).

Taphoota ijoolleen naannoo manaatti utuu taphatanii daawwadhe keessaafi tokko 'ihii yaa himuukoo' dha. Gaafa 24/09/2013 ijoolleen obbo Fidaa (siifanfi Mo'aa)fi Nagaash (Carraafi Latii) mana bira (ollaadha) utuu waliin taphatanii daawwadhe keessatti Latii didaa yeroo dhufu Siifan, Mo'aafi Carraan (yeroon dhaquu sadii ta'anii turan) bifa faaruutii harka walitti rukutaa itti wacuutti ka'an. Walfaana irra deddeebi'anii:

Ihii ya himuukoo  
Mana duuba taa'ii  
Buna naa danfisii jechuu jalqaban

Latiinimmoo "maa'inni, maalan godhe; maal himtu" jedhee gaafannaan, Carraan dafee "mana bira hindeemin isin jedhanii hindeemnee eessaa dhufta?" jedhe. Ammas achumaan walfaana faaruu sana ija ijasa keessa ilaala jechuu jalqaban. Latiin akka dallanuu ta'ee "dhimma keessan himaa, eessan dhaqe anoo asuman oole" jedhe. Kanarraa wanti hubatamu ijoolleen kun ajaja mana bira hindeemnaa jedhamee itti kennname cichaanii akka eeganiidha. Nama ajaja sanarra darbes himuun akka saaxilaniidha. Gocha himanii saaxiluu kana "himuukoo" jedhanii wanta gochuu qaban ta'uu jabeessaanii waamu. Asirraa ijoolleen itti fayyadama afaanii kan

ofiisanii akka qabantu hubatama. Gochi sun akka duraa hinbannee mana duuba kaa'anii qophiidhaan (bunga danfisanii) akka himuuq qophaa'an agarsiisu faaruu sanaan. Kunis ijooleen tapha kanaan hojicha (mana eeguu) keessatti tooftaa ofisaaniin akka wal to'atan mul'isa.

### **Bakkeen Eeguu midhaanii**

Oromo Maccaa horii horsiisuutti dabalataan qonna midhaaniitiinis nibeekama. Midhaan qotamu bineensotaafi horiin mancaa'uu danda'a. Horiin tikee waan qabaniif akka isaan midhaan hinnyaanneef isaatu eega. Bineensota bosonaa warreen akka qalamee, jaldeessaa, booyyeefi simbiraa fa'irraamtoo ijooleetu midhaan sana bira taa'anii gamtaan yookaan dhuunfaan eega. Gaafa guyyaa 17/02/2013 aanaa Giddaa Ayyaanaa ganda Ejereetti daawwannaan taasiseen mucaa Gammadaa jedhamu naannoo manasaanii boqolloofi bisingaa walbira faca'ee jiru eegaa ture.

Guyyaa sana utuun darbaa jiruu qarqara midhaanii dhaabbatee sagalee mucaa wacuu dhaga'een itti gore. "Qabi, qabi, buchii buchii...". Yeroon itti dhihaadhummo bifaa weedduutiin:

Ash qamalee  
Ash morowwaa  
Beelli hinjiruu  
Quufa malee  
Qamuu qamuu dooyyoo  
Obboleettii roorroo  
Boqolloon koo mataa duraa  
Agadaan koos karaa duraa  
Yoo ati nyaatte garaa kee muraa jedha.

Yeroon bira ga'u Gammadaan walbaree maaliif waccita jedhee gaafannan, "qamaleen midhaanirraa oofa" naan jedhe. Gammadaan qabi qabi jedhee saree (buchii) qamalee erga ariisisee booda deemaa jiraachuu mirkanoeffatee midhaansaa nyaachuu akka hindandeenye bifaa garaa gubuu fakkaatuun weeddisaa itti mukuu ba'a. Weedduunsaa kan nama biraa nyaattee quuftetta kankoommoo karaa dura jira itti roorrisuuf sii hinmijatu, yoo ta'es sii hinsifa'u, garaa si muraa jechaa ijaa geggeessa. Weedduun kun akkanni hinmokoofneefi xiyyeffannoos isaa qamalee irraa akka hinfagaanne taasisa. Qamaleenis sagalee sana dhaggessee namni jiraachuu waan bartuus miliqxee seenullee sodaattee darbiti. Kanaaf bakka midhaan eeganitti ijoolee taphoota dammaqanii midhaan akka eegan isaan taasisan taphachuun bakkichi bakkeen taphaa keessaa tokko taasisa.

### **Bakkeen Tikaa**

Hojii ijooleen Oromo Maccaa maatii gargaaran keessaa tokko horii tiksuumdh. Bakki tikaa kun bakka lafa bal'aafi hojii ga'eeyyiin itti hinhirmaanne waan ta'eef, ijoolee horiisanii tiksaa daangaa malee taphatu. Ragaaleen daawwannan dirree qorrannookoo keessaa bakkeen tikaatii sassabee xiinxale taphoonni bakkeen kanatti taphataman kunuunsa yookaan eegumsa horii sanaatiif wantoota isaan raawwatan, jaalala isaan horii sanaaf qabaniifi hariiroo ijoolee sana gidduutti uumamu fa'iin akka walqabatu agarsiisa. Fakkeenyaaaf, ijoolee aanaa Wayyuu Tuqaa ganda Burqaa Baabbuutti gaafa 15/11/2013 horii waliin tiksaa turan keessaa Mitikkuufi Dabalaa "kankootu caala, kankootu caala" jechuun korommii karra saanii keessaa

### *Hundumaa D. fi kb*

jiran walhaasisuuf walitti naquu jalqaban. Kormi Dabalaa, Daalachoon (maqaa kormichaati), harkaan lafa haadhee, boorratee gaafan qotee darbachaa xirqanee barooduun jalqabbii taphichaaf sababa ta'e. Haala kormichaa ilaaltu Mitikkuun “isa kun lafa cirtu kana diimaankoo lafatti ishee dabalaam” jedhe. Kana dhageenyaan Dabalaan “dhaqi fidi akka lafatti dabalu sii ilaalla” jedhe. Kanumaan “dhaqi fidi, dhaqi fidi” waliin jedhanii walhaasisuuf korma ofii ofisaanii fiduuf qajeela. Dabalaan “hirrii Daallee daallachakoo” jechaa yemmuu fidu Mitikkuun “hirri diimaa kormako” jechaa fide. “Hirrii” jechuun qabii loli jechuudha. Yeroo korommii waliin gaararanii lafa qotanii bokkisanii qabatanii walha’uu jalqaban, korommiif jibooti kan biroo kanfedhan tumsanii walmoosisuuf kara karaa baroodaa, xirqanaa, lafa qotaa yemmuu dhufan, ijoolleen hundumtuu irraa dhowwanii warra wal ha’u daawwachuu itti fufan. Dabalaafi Mitikkuun daawwannaarra kan darbe gara korommii sun wal naannessanitti naanna'anii kan ofii ofisaanii deggeru. Wal'aansoo korommii isaanii gidduutti ta'aa jiru akka waan isaan gidduutti taa'aa jirtuutti ilaalu. Kanarraa ijoollee tikeen kun horii tiksaniif marartee guddaa akka qabaniifi hammam akkasaan ofitti dhiheessanii ilaalantu hubatama. Walumaagalatti, taphoonnii bakkeen tikaatti taphataman jiraachuusaaniirraan kan ka'e bakkeen tikaabakkeen tapha ijoollee keessaa tokko jechuudha.

### **Laga Qoraanii**

Ijoolleen shamarranii umriifi qaamaan jabaataa yeroo dhufan akka naannoo jiraataniin walitti dhufanii waaree boodaa (naannoo sa'a kudhanii jalqabanii) laga bu'anii qoraan

*Jor. Dil. Qor. Adoolessaa-Mudddee 2023, 1(2), 73-97*

funaanu. Daawwannaan dirree qorannoo keessatti taasiserraaj ijoolleen dubaraa laga bu'anii qoraan kan funaanan umrii 12-15 gidduutti warra argamaniidha. Gaafa 10/06/2013 ijoollee durbaa Gachii ganda Golee Qorraa dachaa bunaa iddo jedhamuu qoraan funaanuuf yaa'an argee eyyama isaanii ergan argadhee boodha jalqabaa hanga funaananii galanitti daawwadheera. Gaafas ijoolleen waliin qoraan deeman Amaluu, Maabraatee, Kaatimaa, Maskaramfi Abaabilee turan. Yeroo laga bu'an funyoo ittiin qoraan hidhatanii galaniin utaalchoo funyoo taphachaa deema turan. Kaansaanii qofa qofaatti funyoo ofiitiin taphatu. Kaan isaaniimmoo tokko nama lamaan walii qabanii namni tokko yookaan lama gidduu seenee utaala. Erga laga ga'anii booda qoraan funaanuuf jalqaban. Yeroo qoraan funaanan wal waamaa wacaafi kolfaa funaanu. Achiimoo weedduu waljalaa qabaa weedisu. Weedduu isaan weeddisan keessaa tokko kan kanaa gadii ture.

Asan garagale masii nama  
Achan garagale masii nama  
Wayyoo  
Keessa ba'ee dhufuuf nan qabama  
Keessa ba'ii kottu nan farramaa  
Wayyoo  
Ya sangaa Wadajoo  
maasii nama  
ya bokkisa loonii  
maasii nama  
Anaaf siti as oolaa  
maasii nama  
Na doorsisaa ooli  
maasii nama

---

Ijoolleen Zagayyee

maasii namaa  
Warraanatte booyee  
maasii namaa  
Ijoollee na gootee  
maasii namaa  
Nadhaabbattee booddee  
maasii namaa

---

Budaan budaa hinnyaattuu  
maasii namaa  
Yoo buchullaa malee  
maasii namaa  
Eessa natuffathee  
maasii namaa  
Yoo mucummaa malee  
maasii namaa

---

Ach adeemeen dhufaa  
maasii namaa  
Mana Shoroo hindarbu  
maasii namaa  
Na dhahee foolinkee  
maasii namaa  
Akka hinsoosoo garbuu  
maasii namaa

“Asan garagalee, achan garagale...” kan jedhu hunda isaaniiti walfaana jedha. Gidduu gidduutti namni tokko yookaan lamammoo “wayyoo” jedha. Yeroo namni tokko dhahu warri kaanimmoo “maasii namaa” jedhanii jalqabu. Walumaagalatti weedduu sun bakki qoraan funaansaa maasii nama dhuunfaa akka hintaaneefi bakka waloon hawaasichi qabu ta’uu mul’isa. Bakka ga’eyyiin dhimma itti hinbaane fayyadamuun ijolleen kun yaada Chudacoff (2007, f.4)n ijolleen baadiyyaa iddoowan ga’eyyiin hojiirra hinoolle warreen akka lafa tabbaa, bosonafaa, akka

Jor. Dil. Qor. Adoolessaa-Mudddee 2023, 1(2), 73-97  
bakka ofiisaaniitti lakka’uun taphaaf oolfatu jedhuun walfakkaata. Bakka kanattimmoo ga’eyyiin akka argan hinmul’atan. Kanaaf ijolleen walabummaan miira isaanii bakkatti ibsataniidha jechuudha. Kanaaf maasii isa kan nama dhuunfaa keessa darbii iddo walabaa kana kottu itti gaafatamummaasaa naan fudhadhatii (nan farrama) jechuun dargageessa afeeru. “Anaafi sito as oola, kottu nadoorsisaa ooli” kan jedhummoo ga’eyyi bakka sana jiraachuu dhabuufi shamarran kun sadarkaa dargagummaa ga’anii jaala yookaan hiriyyaa dhiiraa kan hinqabataniifi gara sanatti deemuuf gaafatamuuf fedhaa jiraachuutu hubatama. Dargageessi ijolleen taasisee ilaaluun xiyyeffannoo kennuufi dhabuus bifaa komiitiin “eessa na tuffatte yoo mucummaa malee...” jechuun ibsatu. Laga qoraaniitti ijolleen durbaa tapha adda addaa taphachuun taphaaf yoomessa bakka keessaa tokko ta’usaa agarsiisa.

### Bakkeen Taphaaf addatti Hafan

Ijolleen Oromoo Maccaa keesumaa warreen magaalaa keessa jiraatan yeroo irraa hafaa tapha qofaaf oolfatan niqabu. Yeroo akkasiijijolleen itti gaafatamummaa kan biroorraa walaba ta’anii taphatu. Taphoota akkasiif immoo bakkeen wayii qabaatu. Kunis dirreewwaniifi naannoo manneen jirenyaa ta’uu danda’a.

Daawwanna guyyoota 13-27/02/2013 magaalaa Giddaatti taasise bakkeen ijolleen tapha qofaaf itti walga’an akka jiru agarsiisa. Magaalaa Giddaa ganda 01 keessa bakka itti ijolleen waaree booda sa’a 10 kaasanii itti walga’anii akka akka umriifi walitti dhufeenyaa isaanin taphoota adda addaa taphatan nijira. Kana malees, guyyaa roobiifi jimaataa

### *Hundumaa D. fi kb*

istaadiyoom magaalichaatti taphni kubbaa dhaabbataan waan geggeeffamuuf ijoollenis bakka taphaa ganda 01 keessa jiru hafanii maqaa daawwanna kubbaatiin achi deemu. Istaadiyoomichatti garuu tapha kubbaa warri gurguddaan taphatan daawwachuu caalaa ijoollen tapha adda addaa (walari'oo, waldhiitichoo, wal'aansoofaa) kan ofisaanii taphatu. Magaaluma kana keessa qarqara karaa kaabaa dhihaan lagni Waajja jedhamu nijira. Ijoollen magaalichaa irra caalaa guyyaa dilbataa waaree booda bishaan daakuuf walitti yaa'u. Bishaan daakuun alattis taphoota kan biroo kanneen akka walari'oo, dhiitichoo, wal'aansoofaa nitaphatu. Bakkeen kana hunda itti gaafatamummaa kan birooraa walaba ta'anii taphuma qofaaf deemu. Tapharrraa kan hafe hojiin kanbiraan achitti adeemsifamu hinjiru. Magaala Haratoo ganda 01 keessammo manneen gandaa dudulloomoo ijaaramanii jiran gidduutti dirree xiqqoo duwwaa jirurratti ijoollen xixiqqoon yaa'anii ajeessoo, kuukkuu, walari'oo ditichoofaa taphatu. Walumaagalatti, bakkeen taphuma qofaa deeman taphatan niqabu. Kanaaf, taphni ijoolle bakkeen taphuma qofaa adda ba'anii jiranittis nitaphatama jechuudha.

### **Goolaba**

Ijoollen akka garee hawaasaatti akkaataa jirenya ofisaanii qabu. Kunimmoo itti gaafatamummaa isaan ba'u qabanin dabaalama. Raawwii kanaammoo hariiroo ga'eeyyiifi waliisaanii waliin qabaatanirraa adda ba'u hindanda'u. Hariiroo ga'eeyyii waliin qaban yookaan qabaatan keessatti, itti gaafatamummaan isaan fudhatan yeroo baay'ee gahee isaan akka ijoolleetti dhuunfaafi waliin ba'achuu barbaadanirratti dhiibbaa qabaata. Kana jechuun qooda ga'eeyyiin bifa

### *Jor. Dil. Qor. Adoolessaa-Mudddee 2023, 1(2), 73-97*

hojiin isaanii qoodan tapha ijoollen dhuunfaafi waliin akka qaama jirenyasaaniitti xiyyeffatanirratti dhiibbaa geessisa jechuudha. Kana waldandeessanii jiraachuuf ijoollen qooda ga'eeyyiin irraa eegan ba'achaafi sanarraa walaba ta'anii taphachuu akka qaama jirenya ofiitti ilaalanii jiraatu. Kanaaf, ijoollen yoomessa ga'eeyyii waliin qooddataniifi qofaatti qabaatan taphaaf mijeffachuun itti gargaaramu. Yoomessi ijoollen keessatti taphatan kun bu'uuran yoomessa bakkaafi yeroo qabaachuun adda ba'ee hubatame.

Yoomessi akka yeroo tapha ijoolleetti guyyaa keessatti yeroo isaan taphaaf oolfataniifi waqtilee adda addaan walqabatee taphoota addaa addaaf yeroosaan qabaatanidha. Taphooni ijoollen guyyaa guyyaa taphatan irra caalaan warreen hojii utuu hojjetanii taphatanii altokko tokkommoo ijoollen yeroo hojii ala taphaaf oolfatan qabaatanii, keesumaa magaalaa keessatti, taphatanidha. Yeroon taphaa akka qaama hojiitti, yeroo hojii hojjetan akka hinmukoofneef, hojii hojjetan keessatti dammaqiinsa, kaka'umsa horachuuf, ijoolle hojii walfakkaataarratti adda addatti waliin bobba'an walii walqunnamtii uummachuuf, akkasumas, yeroon hojii sun daddafee akka deemuuf barbaadan adeemsa hojii keessatti yeroo taphaaf qabaatan ilaallata. Hojii hojjetan keessatti yeroo boqonnaa qabataniifi yeroo hojiif kennameefirraas hambifatanii ijoollen yeroo taphaa niqabaatu. Galgala galgala ijoollen hojii guyyaa hojjetaa oolanirraa walaba ta'anii waliin bakka ga'eeyyii jiranittis, waarisifanna, boqonnaafi boohartiif nitaphatu. Kun beekamtiiifi eyyama ga'eeyyii jalatti kan taphatamuudha. Waqtileen waggaa akka

### *Hundumaa D. fi kb*

qaama yeroo taphaatti jijjiiramoota haala qilleensaafi naannoo waliin walqabatee taphoota dhufanii darban taphachuuf yeroo ijoolleen qabaatan ilaallata. Haaluma kanaan, bona, arfaasaa, gannaafi birraa keessatti taphoonni taphataman adda addummaa qabaachuun taphaaf yeroo adda addaa ta'uusaanii agarsiisa.

Bakki akka yoomessa tapha ijolleetti iddoowwan ijoolleen itti taphatan wajjin kan walqabatuudha. Kunis bakkeen hojii, bakkeen turtii yookaan boqonnaafi bakkeen taphaaf addatti hafaniidha. Bakkeen hojii akka yoomessa bakka ijolleetii bakkeen itti ijolleeni qooda hojii isaanii qoodame hojjechaa itti taphatan hunda hammata. Isaanis manneen barumsaa, bakka tika, bakka midhaan eeguu, laga qoraanii, laga bishaanii, manaafi naannoo manaati. Manaafi naanno manaa bakkeen itti ijolleen hojii hojjechaas ta'e hojiirraa walaba ta'anii itti taphachu danda'aniidha. Ijolleen durbaafi ijolle xixxiqroof yeroo baay'ee hojii naannoo manaafi mana keessaatu kennama. Kanaafi bakki kun isaaniifi bakka itti hojjechaa taphatan ta'u danda'a. Manneen barumsaatti yeroo boqonnaafi barnootaan ala ijolleen mooraa mana barumsaa keessaafi dirree kubbaafaa akka turaniifi boqotan yemmuu ta'u, ijolleenimmoo bakkeen kanatti taphaan boqotu. Kana malees, bakkeen addatti tapha ijolle qofaaf naannoo keessatti hafan jiru. Fakkeenyaaaf, dirreewwaniifi bakkeen naannoo qe'ee waliin jirenyaatti tapha ijolleef hafaniifi lageen itti ijolleen taphoota adda addaa taphataniifi daakaafaa qofaaf deeman kan keessatti hammatamu. Walumaagalatti, ijolleen yoomessa adda addaa keessatti

*Jor. Dil. Qor. Adoolessaa-Mudddee 2023, 1(2), 73-97*  
taphoota adda addaa akkaataa adda addaa taphachaa jiraatu.

### **Wabiilee**

- Bronner, S. J. (1988). *American Children's Folklore*. New York: August House Inc,
- Brewer, J. (2000). *Ethnography*. Philadelphia, Buckingham. Open University Press
- Chudacoff, H. P. (2007). *Children at Play: An American History*. New York and London. New York University Press.
- Cieślikowski, J. (2019). Children's Folklore. Filipenko's, 9. (2019). DOI: 10.23817.9-29
- Dejene Gemechu. (2014). Oral text in cultural and natural context: Riddles among the Walisoo Liiban Oromo. *Ethiop.j.soc. lang. stud.* 1(1), PP, 41-62.
- Eder, D. (2010). Life Lessons through Story Telling: Children's Explorations of Ethics. Bloomington: Indiana University Press,
- Finnegan, R. (1967). *Limba Stories and Story-Telling*. Oxford: Oxford University Press.
- Gosso, Y. (2010). *Play in Different Cultures*. In Smith.Peter K., Children and Play (pp.80- 98) UK: Blackwell Publishing.
- Gouglous, C.G. (2003). *The Material Culture of Children's Play: Space, Toys and Commoditization of Childhood in Greek Community*. PhD Dissertation. University College London.
- Grider, S. A. (1980). *The Study of Children's Folklore*. Western Folklore, 39(3), Children's Folklore, pp. 159-169. Western States Folklore Society. Stable URL: <http://www.jstor.org/stable/1499798>. Accessed: 29/05/2010 11:33
- James, A., and Prout, A. (1997). Constructing and Reconstructing Childhood:

*Hundumaa D. fi kb*

- Contemporary Issues in the Sociological Study of Childhood (edition). London & Washington. Falmer Press.
- Kuyvenhoven, Jo. (2007). ‘What Happens Inside Your Head When You Are Listening to a Story? Children Talk about Their Experience during a Storytelling’. *Storytelling, Self, Society: An Interdisciplinary Journal of Storytelling Studies* 3(2): 95–114.
- Mechling, J. (1996). “Children’s Folklore.” In *Folk Groups and Folklore Genres: An Introduction*, edited by Elliott Oring, 91–120. Logan, Utah: Utah State U P.
- Norozi, A. S., & Moen, T. (2016). Childhood as a Social Construction. *Journal of Educational and Social Research*, 6(2), 75-80.
- Plastow, M.G. (2015). WHAT IS A CHILD? Childhood, Psychoanalysis, and Discourse. New York. Routledge.
- Rasmussen, K. (2004). Places for Children – Children’s Places. *Childhood*. 11(2): 155–173. www.sagepublications.com. 10.1177/0907568204043053
- Sims, M. C., and Stephens, M. (2005). Living Folklore: An Introduction to the Study of People and Their Traditions. Utah: Utah State University Press.
- Smith, K. P. (2010). Children and play. Wiley Blackwell.
- Tadesse Jaleta. (2011). “Children as Interpreters of Culture: Producing Meanings from Folktales in Southern Ethiopia.” *Journal of Folklore Research* 48 (3): 269–292.
- Tadesse Jaleta. (2013). Children and Oral Tradition Among the Guji-Oromo in Southern Ethiopia. Thesis for the degree *Jor. Dil. Qor. Adoolessaa-Mudddee 2023, 1(2), 73-97* of Philosophies. Trondheim. Norwegian University of Science and Technology
- Tadesse Jaleta. (2014). Positive parenting: An ethnographic study of storytelling for socialization of children in Ethiopia. *Storytelling, Self, Society* 10(2): 15–33.
- Tadesse Jaleta. (2018). The cultural spaces of young children: Care, play and learning patterns in early childhood among the Guji people of Ethiopia. *Global Studies of Childhood* 2019, 9(1) 42–55
- Tucker, E. (2008). *Children`s Folklore: A Handbook*. New York: Greenwoods Publishing Group.
- Tucker, E. (2012). Changing Concepts of Childhood: Children’s Folklore Scholarship since Nineteenth Century. *Journal of American Folklore* 125(498). 389-410.